

Iwarakha yo upachera i Napaolo wa

Attu o Ukorintho Malhove o uholhelha

Iwarakha yo upachera i Napaolo wa attu o Ukorintho yaalhepiye ni akarumiya Napaolo nyaakha cho 55 baada yo uyaria wa Kuristo (nlhako wo 1:1). Ilha phi iwarakha yo upachera mu iwarakha pilhi chaalhempe aya Napaolo wo nlhoko wa attu anrumelhenlhe Kuristo o Ukorintho. Ni veekinaka yaalhempe ilha iwarakha ilha ikatema yaakkhalha aya Uefeso ahinaya ulhakelha nkwaha aya wo Ukorintho yeetaka urwaa ni uhokolhia Umakedoniya (nlhako wo 16:5-9). Ilha iwarakha ilha phi waakhulha wa Napaolo wo malhove yeewa aya ukhuma wa attu anrumelhenlhe Kuristo yaachaka mwaha wo chittu cho uhilhoka lhoka chaapangiya munhokoni mmo, ikhalhaka mwaha wo umwalhaana ni mihapo cho ishembwere. Iwani yo Ukorintho yaari ichuwaniaka wo mitheko chaya cho ishembwere, ihithikinehaka wiira nlhoko wa attu anrumelhenlhe Kuristo yaari akumaanaka ni yoyo mwaha uyo. Ikitabu yo iwarakha yo upachera wa attu o Ukorintho tho ihaana nlhako unohimiacha mwaha wo uttunana (nlhako wo 13).

Chiri nhina,

Napaolo anowaashikuria attu o Ukorintho ni unshukuru Nlhuku wo yayo manyaattu ayo (nlhako wo 1:1-9).

Tho, anohimiacha mwaha wiiwilhe aya unohimiacha umwalhaana mmilhokoni mwa attu anrumelhenhe Kuristo o Ukorintho (nlhako wo 1:10-4:21).

Thothoni tho, anohimiacha mwaha wo mihapo cho ishembwere ni mwaha wo urweehaniya umilhatuni (nlhako wo 5-6).

Baada yo vavawo anooohimiacha meettuchiho anaacha nthelhi, ulhapelha isinyago, ulhapelha voonene, isadaka cho munnepani ni uhihimmwa nnookhwani (nlhako wo 7-15).

Anomalhiha wo uhimiacha mwaha unaacha anene ayo (nlhako wo 16).

¹ Mii Paolo kiihaniye ukhalha karumiya a Kuristo Yesu wo uthanana wa Nlhuku. Mii ni munnihu Sostene,

² ninoolhepa iwarakha uwiiha uwaninyu mwaatti nlhoko wa attu a Nlhuku nrri Ukorintho nhapihiye wo ulhutaana ni Kuristo Yesu, nkamweehaniya ukhalha attu a Nlhuku, vamoka ni attu onkhaye anrumelhenhe Kuristo, Athithi, ari awihu ni hii.

³ Kinoulhapelhelhani nnema ni mpuha ukhuma wa Nlhuku Athumwanihu ni Athithi Yesu Kuristo.

Ibarakha cha Nlhuku

⁴ Kinonshukuru Nlhuku mahuku onkhaye alha wo nlhatu no uttuvani mwaattiva nnema wawe wo iphiro yo Kuristo Yesu.

⁵ Ukhalhawayha wo ulhutaana ni Kuristo nhovahiya nhakhu wo chittu chonkhaye, vamoka ni uhimiacha nretelhe ni uvahiya irusho cho uchuwelha.

⁶ Ukhalhawayaya nttenga unonhimiechesha Kuristo we ikekhiaye uhokhomaalhihiya nhina mwinyu,

⁷ nhiwukuwelhiyaka mahalha ariyothe o munnepani vanoweherera inyu upatakulhiya wa Athithi Yesu Kuristo.

⁸ Yoyo noukhomaalhihani mpaka umalhelha wiira mmwe mwoonia attu o uhikhuwachiya nihuku na Athithi Yesu Kuristo nne.

⁹ Nlhuku owiihanneni mwaattiva nkhalhe nlhoko mmoka ni Mwaamwanawe Yesu Kuristo Athithi ri o ukhulhuvelhiya.

Umwalhaana nlhoko wa attu anrumelhenlhe Yesu

¹⁰ Ashilhoko aka kinoulhepelhani wo nchina na Athithi Yesu Kuristo wiira mwiiwanane chittu chinolhumacha inyu, uhiiwanana uhikhalhe nhina mwinyu. Muupuwelheke wo irusho imoka ni nrima mmoka.

¹¹ Ashilhoko aka, attu akina amuchi a Nakiloe, ahohimia ikekhiaye wiira khanneewanana munlhokoni mwinyu.

¹² Ittu kinothanana aka uhimia etu phi ilhe kiwiwilhe aka uwaninyu, kila mmoka noolhumacha chawawe, mmoka neera, "Mii kinaattwara Napaolo." Nkina, "Mii kinaattwara Naapolo." Nkina, "Mii a Nakefa", ni akina, "Mii a Kuristo."

¹³ Chani, Kuristo homianihiya? Chani, Napaolo phi akhomelhelhiye vansalaabani wo nlhatu winyu? Ama chani, mwaabatiiziye wo nchina ni Napaolo?

¹⁴ Kinonshukuru Nlhuku wiira akambatiizilhe ntu riyothe munlhokoni mwinyu yaahikalheru Nakurispo ni Nagayo.

15 Wo chiichammo etu khaawo ntu nohalha uhimia wiira batiiziye wo nchina naka.

16 Eiyo, kahaabatiiza attu o unupani wa Nastefana nansho uthepa yayo, akambatinze ntu nkina riyoothe.

17 Ukhalhawayaya Kuristo khaakirumme waa-batiiza attu, nansho kirumilhe uhimiacha Malhove Orera, tho, keettuchinhe wo uhikhulhu-velha irusho cho malhove a attu, ikhalhe wiira machiri o nookhwa a Kuristo vansalaabani ahirukunushiye.

Kuristo ni machiri ni irusho cha Nlhuku

18 Ukhalhawayaya nttenga wo nookhwa a Kuristo vansalaabani phi nlhove no ukumbafu wo alhe arii mu upoterani nansho wo hii noopolhiyeva, yoyo nttenga uyo phi machiri a Nlhuku.

19 Ukhalhawayaya Malhove Matakatifu aneera, “Kinootanganya irusho chaya attu o irusho, Kinoorihelha utayi ushoma waya attu ashomilhe.”

20 Ri vayi etu, ntu o irusho? Ri vayi etu, owiittuchiha Ikekchia? Ri vayi etu ovanyiha o ilha ikatema ilha? Nlhuku hopanga irusho cho mwiilhaponi ukhalha cho uhikhalha maana.

21 Ukhalhawayaya Nlhuku wo irusho chawe, attu o velhaponi khanonchuwelha Nlhuku wo iphiro yo irusho chaya ashinene. Vatulhi waya, Nlhuku hottuna woopolha attu anonrumelhelha alhe wo nttenga unohimiacha ihu, iphiro inooniya ni attu o irusho wiira yo uhikhalha maana.

22 Ayahudi anovekelha woona ithikineha ni Ayunani anaavia irusho

23 nansho hii ninonhimiacha Kuristo aakhome-lhelhiye vansalaabani. Nttenga unoonia wa Ayahudi wiira itiyelhelho, ni ukumbafu wa attu ahiri Ayahudi.

24 Nansho wa onkhaye eehaniye ni Nlhuku alhe, Ayahudi ni Ayunani, Kuristo phi machiri a Nlhuku ni irusho cha Nlhuku.

25 Ukhalhawayo inoonia ukhalha phi ukumbafu wa Nlhuku, phi irusho upwaha irusho cha ntu ni ittu inoonia uhikhala ni machiri wa Nlhuku, phi yo machiri upwaha machiri a attu.

26 Ashilhoko aka, muupuwelheke vano wiira ikatema veehaniye inyu ni Nlhuku enchi inyu khamwaarina irusho cho uchuwelha chittu cho munttuni enchi khayari attu o machiri ama attu o pilhi waapwaha attu akina.

27 Nlhuku ahothanlha chittu choonia wiira cho ukumbafu cho mwilhaponi wo nlhatu no woolhihacha muru attu o irusho, tho ahothanlha chittu chihiri ni machiri wiira olhihache muru attu o machiri.

28 Nlhuku ahothanlha chittu cho uheulhachiya cho mwilhaponi choonia wiira phi malhove o uhikhala maana wo nlhatu no utanganya chittu choonia ni attu wiira phi chorera ata chahaariwo.

29 Paahi etu, khaawo ntu nooria wiifunelha iryoothe mmiholho mwa Nlhuku.

30 Nlhuku mwanene phi uyo olhutaninheni mwaattiva ni Kuristo Yesu. Nlhuku homvaha Kuristo akhalhe phi uchuwelha wihu, ni ikekchia ni utakatifu ni woopolhiya.

31 Paahi etu, thoko Malhove Matakatifu chino-himia aya,

"Ntu neeshipa,
Efunelheke etu ntheko wa Athithi."

2

Nttenga wa Kuristo aakhomelhelhiye vansalaabani

¹ Ashilhoko aka, mii vaawilhe aka uwaninyu, akohimiachenreni nttenga uvithiye wa Nlhuku wo nulhumo noochiva, ama wo irusho ya ntu.

² Vaariaka uwaninyu kaholhakelha uhichuwelha ittu iriyoothe yaahikhalheru unchuwelha Yesu Kuristo aakhomelhelhiye vansalaabani.

³ Vaari aka uwaninyu kaari ohuperiacha, koovaka ni uthukumelha chinene.

⁴ Malhove koolhumachilhe aka ni meettuchiho aka, akoolhumachilhe wo uchivelhihani ni wo irusho, nansho wo uhimiecheshiya chinene ni machiri o Iphumu ya Nlhuku.

⁵ Kaapangilhe chiicho wo nlhatu no wiira nrima winyu ukhulhuvelhe machiri a Nlhuku, mena kuhiwe irusho cha ntu.

Irusho cha Nlhuku

⁶ Inakhalhaka chiicho, hii ninohimiacha nttenga wo irusho cha attu akhomanlhe munnepani nansho chechiyo irusho chiyo khachihowi cho velhaponi va, mena kachihena cha aholhelhi anotawara ilhapo ilha ari muupoterani.

⁷ Ninouhimiacherani irusho chivithiye cha Nlhuku chaalhakenlhe awe toka machokholhelho, ilhapo ihinaya wuupiya wo nlhatu no nthimichio wihi.

⁸ Khaawo aholhelhi o utawara o velhaponi va yaachuwenlhe chilha irusho chilha. Yakaachuwenlhe, khayaakhomelhelha Athithi o nthimicho vansalaabani.

⁹ Nansho, thoko Malhove Matakatifu chinohimia aya,

“Chittu chihinapacha niitho woona

Mena nnyaru wiiwa,

Chittu chihinapacha ntu wuupuwelha munrimani,

Chechiyo phi chiyo Nlhuku cheeshenre awe attu anonttuna.”

¹⁰ Nansho Nlhuku ahonipatakulhelha hii wo iphiro yo Iphumu awe. Ukhalhawayaya Iphumu ya Nlhuku nowaavia kila ittu ata malhove a Nlhuku avithiye nhina hinanini.

¹¹ Mpani munlhokoni mwinyu nooria uchuwelha mwaha wo nhina wa ntu ihikhalhe iphumu rii nhina mwa yoyo ntu uyo? Chiichammo etu, khaawo nochuwelha mwaha wa Nlhuku yaahikhalhe Iphumu ya Nlhuku vekha aya.

¹² Hii khanipochenre iphumu yo velhaponi, nansho nipochenre Iphumu irumiye ni Nlhuku, wiira nikhalhe nichuwelhaka nnema uvaheriyeihu ni Nlhuku ulhe.

¹³ Paahi etu hii khaninoolhumacha wo malhove aneetuchihiya wo irusho cha ntu, nansho ninoolhumacha wo malhove anettuchihiya ni Iphumu ya Nlhuku nilhamulhaka ikeekhene yo munnepani wa attu arii ni Iphumu ya Nlhuku.

¹⁴ Ntu riyothe hirii ni Iphumu ya Nlhuku khanooria upochera mahalha anokhuma wa Iphumu ya Nlhuku. Attu thoko yayo

khachuwenlhe mena uwannyawe yoyo ntu uyo malhove ayo anokhalha thoko ukumbafuru ukhalhawaya anochuwelhiya tu wo woorihiya ni Iphumu ya Nlhuku.

¹⁵ Ntu riyothe rinaa Iphumu ya Nlhuku, wo iphiro iriyoothe, nowooria uchuwelha ushichira wo kila ittu, nansho hikhalhaka ntu nooria unhukumulha.

¹⁶ Malhove Matakatifu aneera,
“Mpani nochuwelha irusho cha Athithi?
Apani anooria weettuchiha Athithi?”
Nansho inakhalhaka chiicho, hiyaano nihanaa irusho cha Kuristo.

3

Anamitheko a Nlhuku

¹ Ashilhoko aka, miyaano akonrie wulhumacha ni inyu mwaatti thoko attu arii ni Iphumu ya Nlhuku. Koolhumanche ni inyu thoko attu o velhaponi, thoko ashinamwane nhina nrima wa Kuristo.

² Koovanheni mapelhe, kuhiwe yolhia yo ulhipa, ukhalhawaya mwaari nhinaaya vo ulhia. Eiyo, ata vano nna khannoria ulhia yolhia yo ulhipa.

³ Ukhalihawaya bado nnokhalha thoko attu o velhaponi chinokhalha aya. Chani khuwo woonelhana ihache ni waana indewo mwaashineneru? Yayo onkhaye ayo anooniha wiira nnokalha thoko attu o velhaponi va, wo ukhalha thoko chiri aya.

⁴ Mmoka inyu veneera awe Miyaano kinaatwara Napaolo akina Mii kinaatwara Naapolo,

chan i ye yo khinooniha wiira nnokalha thoko
attu o velhaponi va?

⁵ Ana Naapolo phi apani? Ni Napaolo phi
apani? Hiyaano anamitheko tu a Nlhuku noowi-
henreni mwaattiva nlhove ninorumelhelha inyu.
Kila mmoka ihu novara nthekeo uvahiye awe ni
Athithi.

⁶ Mii kahaalha imbeyu, Naapolo nkayaahel-
helha maashi, nansho Nlhuku phi melhinhe
imbeyu.

⁷ Ntu aalhilhe imbeyu ni ntu michenre maashi
khave ittu. Nlhuku mwanene phi melhinhe
imbeyu.

⁸ Ntu aalhilhe ulhe ni ntu michenre maashi
ulhe, oyelhi ayo arii ittu imokaru, inakhalhaka
kila mmoka nowa upochera nttuvo nawe ul-
hikaana ni nthekeo vanre awe.

⁹ Ukhahlawaya hii phi attu o nlhoko mmoka
ninovara nthekeo vamoka ni Nlhuku, mwaattiva
phi imata ya Nlhuku ni mwaattiva phi inupa ya
Nlhuku.

¹⁰ Wo ukavihereriya ni nnema ukivahilhe awe
Nlhuku, kihoria wo irusho utheka nsingi, un-
thekiya vachulhu vaya ni ntu nkina. Paahi
kila mmoka akhalheke miitho vanotheka awe
vachulhu waya.

¹¹ Khaawo ntu nooria utheka nsingi nkina
ukhalhwaya Yesu Kuristo mwanene phi nsingi.

¹² Vachulhu yoyo nsingi uyo ntu nowooria
utheka wo malhuku o idhahabu ama malhuku
anhaniya makhibilhi o nchurukhu ama wo mal-
huku makina o nhakhu mwinchi ama wo miri
ama wo mathaakhuru ama wo manyashi.

¹³ Ata ikeriye chani, ulhoka wo ntheke wo kila mmoka unolhoha woonia nihuku na Kuristo nne vanohalha aya upatakulhiya. Ukhahawaya, nenne nihuku nno mooro unowa upatakulha ntheke wa kila mmoka, ni yoyo mooro uyo unowa uphima ni wooniha ulhoka waya.

¹⁴ Yakhahaka ntheke wa yoyo ntu thekilhe yoyo nsingi uyo unoowa waavilhelha yoyo mooro uyo, noowa aattuviya

¹⁵ nansho ntheke wa ntu uyo waviaka mooro, paahi, nookhwa nrima. Nansho mwanene uyo nowoopolhiya thoko howiira ukulhuphuwa ukhuma vamooroni.

¹⁶ Chani, khanchuwenlhe wiira mwaattiva phi Inupa ya Nlhuku ni Iphumu ya Nlhuku nokhalha nhina mwinyu?

¹⁷ Paahi, ntu atanganyaka Inupa ya Nlhuku, Nlhuku nontanganya ukhalhawaya Inupa ya Nlhuku phi inupa itakatifu, ni inyu mwaattiva phi Inupa ya Nlhuku.

¹⁸ Nhiiithepiache! Ntu riyothe munlhokoni mwinyu echoonaka ukhalha o irusho yo velhaponi, nambaya akhalhe o uhichuwelha ittu wiira apatte irusho yo ikeekhene.

¹⁹ Ukhahawaya, irusho cho velhaponi va phi ukumbafu uholho wa Nlhuku. Ukhahawaya Malhove Orera aneera, “Nlhuku nowaawayiha arii ni irusho muupenyani mwaya.”

²⁰ Ni tho aneera, “Athithi ahochuwelha wiira waanyihera wa attu o irusho khunolhoka.”

²¹ Paahi, ntu hiifunelhe mitheko cha attu. Ukhahawaya kila ittu yawinyu.

²² Napaolo ama Naapolo ama Nakefa ama ilhapo ama ukumi ama nookhwa ama malhove o naanano ni o kaanyuma, onkhaye awinyu.

²³ Ni mwaattiva phi attu a Kuristo ni Kuristo phi a Nlhuku.

4

Akarumiya a Kuristo

¹ Ntu anooneke hii etu ukhalha phi anamitheko a Kuristo nivahiye ipilhi vachulhu malhove avithiye na Nlhuku.

² Ukhulhuvelhiya phi ittu inothananiya wo ntu riyothe vahiye ipilhi ni ukhulhuvelhiya.

³ Nansho uwannyaka mii, khave ittu kahuku-mulhiyaka ni inyu mwaatti ama uhukumulhiya ni ipuwa cha attu. Eiyo, mena mii kimwanene akineehukumulha.

⁴ Ukhalhawaya nrima aka khunokiriaa milhatu wo nlhove niriyothe, nansho yeo khinokaalhakelhelha ikekchia wiira akittenke. Athithi phi anokihukumulha mii.

⁵ Paahi, nnihukumulhe ikatema ihinaaya nhyeke mpaka Athithi vanohalha aya uwa. Yayo anoowa aahumbukulha malhove eevithilhe mwiipiphini, ni wooniha mwaari mirima cha attu. Vavawo kila mmoka phi nohalha awe utotopelhiya unophwanelhiya awe ukhuma wa Nlhuku.

⁶ Ashilhoko aka, ayo onkhaye ahimianche aka waacha Naapolo ni ukaacha mii ayo phi wilhikaaniha uwaninyu. Wo uttuna waka wilhikaaniha mii ni Naapolo uwo, kinothanana wiira nchuwelhe maana o nna nulhumo nna

"Nrumelhelheke malhove alhepiye." Vavawo khannowa mweeshipelha ntu mmoka ni unheulhacha ntu nkina.

⁷ Ukhahawaya apani olhikaninheni inyuva? Nrina nipampa naani? Nansho yakhahaka nhovahiya, nlhatuni etu no uhirumelhelha thoko khanvahiye ittu?

⁸ Haya etu, nnaanyihera wiira nhopatta kila ittu! Nhokhalha attu o nhakhu! Nhokhalha mamwene wo uhikhalha hii! Eiyo, we ikekhiaye nanthanana nkhalheke attu o utawara, wiira ni hii nitaware chiicho vamoka ni inyu mwaatti.

⁹ Ukhahawaya kinaanyihera wiira Nlhuku honipanga hii akarumiya va ukhalha attu o umalhelha, thoko attu ahukumulhiye wiiviya, ukhalhawaya nihokhalha attu othiachiya mwilihaponi mwonkhaye, uholho wo minepa ni wa attu.

¹⁰ Hii nihokhalha akumbafu wo nlhatu na Kuristo, nansho mwaattiva phi o irusho mu ulhutaanani ni Kuristo! Hii phi ohuperia, mwaatti nrri omachiri. Mwaattiva nnoohelhelhiya nansho hiyaano ninoovehachiya.

¹¹ Mpaka nna, hii ninoowolhiya ithalha ni nttona, khanirina ikuwo, ninowaatiya makofi ni mena khanirina mapuro.

¹² Tho ninoohuva ni uvara ntheko wo miono chihu naashinene. Naruwaniyaka, ninowaalhapelha ibarakha nathurulhiyaka, ninoovilhelha

¹³ naruwaniyaka, ninaakhulha wo umanya. Mpaka vano nihopangiya thoko unyalha wo velhaponi ni wo kila ntu hiyaano ninoonia thoko ikokholha!

14 Akinolhepa alha malhove alha wo nlhatu no uwulhihachani muru mwaatti, nansho wo nlhatu no uwaamukani achishaana aka kinaattuna aka.

15 Ukhalhawaya ata nkalhanaka maelufu a attu o ulhelhani muukhalhani makhalhelho e Ikuristo, athumwaninyu kirii amoka tu. Ukhalhawaya muulhutaanani ni Kuristo yesu mii phi oyarilheni wo iphiro yo Malhove Orera.

16 Wo chiichammo etu, kinoulhapelhelhani wiira, ntwariheke meetelho aka.

17 Yoyo phi nlhatu wo waaruma Natimotheo uwaninyu. Yayo phi anaaka anaattuna aka o ukhulhuvelhiya muulhutaanani ni Athithi. Anowupushani iphiro inotwara aka muulhutaanani ni Kuristo Yesu iphiro ineettuchiha aka mwonkhaye kila vanokumaana aya attu anrumelhenle Kuristo.

18 Paahi etu munlhokoni mwinyu achochokholha ukhalha attu aneefuna yaanyiheraka wiira akinowa uwaninyu tho.

19 Nansho Athithi akivaheraka, kinoowa uwaninyu chitema ni vavawo phi nohalha aka wiichonelha kimwanene, kuhiwena ittu inooria aya wulhumacha attu aneefuna ayo nansho ni ilhe anooria aya upanga.

20 Ukhalhawaya umwene wa Nlhuku kuhiwe wo malhoveru, nansho wo machiri.

21 Nnothanananani? Kiwe uwaninyu kinaweelelhe ikopo, ama kiwe ni nrima wo uttuna ama ni nrima wo wiitimarikha?

Ulhuva uhochara mwa attu a Nlhuku

¹ Malhove e ikekhiaye aheewania wiira uhaawo nhapo wo ishembwere unopangia munlhokoni mwinyu tho ishembwere yo uhilhoka ihinapacha upangia munlhokoni mwa attu ahiri Ayahudi. Kihohimeriya wiira eti mmoka inyu norupa ni mahantu a athumwanawe!

² Ni inyu nnowiitithacha vavavo? Nhifune nansho nchukulheke ni yoyo ntu pangilhe yeo ittu iyo munthamiheke munlhokoni mwinyu.

³ Ni mii uwannyaka, ihookhalharu akirii wowo kimwanene wo iruttu, nansho munrimani kiri vamoka ni inyu mwaatti. Ata chiicho etu, ikhalhaka thoko kirii wowo, kihomalha unhukumulha yoyo ntu pangilhe ittu yo wuulhihacha muru uyo.

⁴ Ikatema inothukumana inyu vamoka wo nchina na Athithi Yesu ni mii kikhalhaka vamoka wo nrimala, paahi machiri a Athithi Yesu ari vamoka vavavo,

⁵ mummaheke Nakare yoyo ntu uyo, iruttu awe itanganyiye, ikhalhe wiira nrimala awe uwe woopolhiya nihuku na Athithi nne.

⁶ Wiifuna khunlhoka! Chani mwaatti khannochuwelha wiira ihengedure vakani inowooria ururumulha iphepa yonkhaye?

⁷ Mwiihapiheke chinene, nrighelheke utayi ihengedure yo khalhayi nkhalheke nibonji nihithakanahiye ihengedure thoko chinothananiya inyu ukhalha. Ukhalhawayaya, Kuristo, mwaakhondoro ihu o Pasaka, homalha ukumihiya ukhalha isadaka.

⁸ Paahi, niterekheke ikaramu iyo ihikhalkhaka yo nkatte uthakanahiye ihengedure yo khalkhayi, ihengedure yo unanara ni uhilhoka, nansho yo nkatte wo uhithakanahiya ihengedure, nkatte wo urera nrima ni ikekjhene.

⁹ Nhina iwarakha aka kaalhempe wiira nhivaraane ni attu o ulhuva.

¹⁰ Ikekheene iri wiira akaacha attu onkhaye velhaponi anluva ama attu o ilhema ama attu owoothacha ama anlhapelha mashoka. Ukhalkhawaya, waashemba attu onkhaye ayo ikaathananiye mwaattivava uthama velhaponi va!

¹¹ Ittu yaalhepilhe aka phi ilha, nhivaraane ni nhima inyu Nkuristo rii ntu o ulhuva ama ntu o ilhema ama nolhapelha mashoka ama ntu o waaniha attu ama ntu o uhapalhiya ama ntu owiiya. Ntu o yayo meetelho ayo, ata yolhia nhinlhiane.

¹² Chani, phi nlhove naka waahukumulha attu ahirii munlhokoni mwinyu?

¹³ Yayo Nlhuku phi nohalha awe waahukumulha. Ama chani mwaatti khannothananiya waahukumulha attu arii munlhokoni mwinyu? Mmwomolhelheke utayi yoyo ntu o uhilhoka uyo!

6

Milhatu cha attu anrumelhenlhe Kuristo

¹ Nooria chani mmoka inyu unrweeha nlhoko awe nrumelhenlhe Kuristo nkhunanawe

upuwani wa attu ahinchuwenlhe Nlhuku un-hukumulhani ni uhiya unrweeha upuwani wa atakatifu a Nlhuku?

² Ama chani, khanchuwenlhe wiira attu a Nlhuku phi nowa uhukumulha ilhapo? Yakhala-haka etu, ilhapo inowa uhukumulhiya ni inyu mwaatti, nlhatuni etu no uhiphwanelhiya uhukumulha ata malhove makani?

³ Chani, khannochuwelha wiira wo uthepa ninoowa naakhalha o uhukumulha ata minepa o wiirimu? Vamoka ni uhukumulha malhove makani o kila nihuku.

⁴ Vanokhalha inyu ni milhatu cho uhiwanana cho malhove inyu o mahuku ene, nlhatuni etu no weehana uwa uhukumulhani attu ahinaalhoha attu anrumelhenlhe Kuristo?

⁵ Ana khannokelhiya nipampa! Niireke wiira khaawo ata ntu mmoka munlhokoni mwinyu rii ni irusho cho wooria uhukumulha malhove o uhiwananiya a attu anrumelhenlhe Kuristo?

⁶ Nansho nholhemalhelha ntu unrweeha nhima awe umilhatuni, tho uholho wa attu ahinrumelhenlhe Kuristo wiira ahukumulhiye.

⁷ Wo ikekhiaye wowo uhukumulhana chittu cho uhilhoka mwaashineneru uwo, unowooniha wiira nhokufia chinene! Chani, khanaari nlhove norera chinene mwaatti uthurulhiya? Ama khayaarerera chinene mwaatti waakhiya mihakhu chinyu?

⁸ Nansho, vatulhi waya, mwaatti phi inyu nnopanga chittu cho uhilhoka ni waakhacha, tho, yayo nnaapangelha achihima inyu!

⁹ Ama chani, khannochuwelha wiira attu o uhilhoka khanowa aahiyeriya umwene wa Nl-

huku? Nhiithepiache! Attu ankhahelha mwaha wo ulhuva ama anolhapelha mashoka ama o ishembwera ama anorupa ni alhopwana nanaya

¹⁰ ama owiiya ama o ilhema ama o uhapalhiya ama o waapa ama o uvvara makhuche, yayo onkhaye ayo khanowa yaakelha Imwene ya Nlhuku.

¹¹ Attu akina munlhokoni mwinyu mwaari thoko chiicho nansho vano nhaalhakelhiya, nkamwathanlhiya ukhalha oombone ni uratihiya ni Nlhuku wo nchina na Athithi Yesu Kuristo ni wo Iphumu ya Nlhuku.

Ntumiyeyeke iruttu chinyu wo nthimicho wa Nlhuku

¹² Ntu nowooria uhimia wiira “Wo mii kila ittu inookilhoka.” Eijo nansho kiheena kila ittu inolhoka uwannyaka. Kinoorumelhelha wiira kila ittu inorera nansho akinottuna utawariya ni ikuru iriyoothe.

¹³ Nnowooria wiira, “Yolhia irii wo nlhatu no nthunkwa ni nthunkwa nirii wo nlhatu no yolhia.” Eijo nansho Nlhuku noowaaatanganya chonkhaye pilhi chiyo. Iruttu ya ntu kihewe wo nlhatu wo ulhavalhava nansho wo nlhatu na Athithi ni Athithi wo nlhatu no iruttu.

¹⁴ Paahi, Nlhuku aahihimunshe Athithi unookhwani nonihihimusha ni hii chiicho wo machiri awe.

¹⁵ Chani, khannochuwelha wiira iruttu chinyu phi itturi cho iruttu ya Kuristo? Chani, kikusheke itturi cha Kuristo ni upanga ukhalha itturi cha nthiyana o ulhavalhava? Ata vakani mena!

¹⁶ Ukhahawaya, thoko chinochuwelha inyu, ntu nolhutaana ni nthiyana o ulhavalhava

nokhalha iruttu imoka ni uyo thoko chilhepiye
aya, "Ni ayo elhi ayo anookhalha iruttu imoka."

¹⁷ Nansho ntu lhutaanne ni Athithi nokhalha
nrima mmoka ni ayo.

¹⁸ Nshembeke chinene iphiro cho muulhuvani.
Uwonya ukina wonkhaye khunopangiya mwi-
iruttuni nansho ulhavalhava unopangiya mwi-
iruttuni wa ntu mwanene.

¹⁹ Ama chani, khanchuwenlhe wiira iruttu
chinyu phi Inupa yo Iphumu ya Nlhuku rii nhina
mwinyu, mwaapochenre inyu ukhuma wa Nlhuku?
Mwaattiva etu, iruttu chinyu khachihiw
nhakhu inyu mwaashinene.

²⁰ Mwaatti mwoopolhiye wo nhakhu mwinchi.
Paahi etu, iruttu chinyu chinthimicheke Nlhuku.

7

Mwaha wo uthelha

¹ Vano kinaacha malhove yaalhepilhe inyu
alhe, eiyo, ihorera nlhopwana ahalhaka wo
uhithelha

² nansho wo nlhatu wo itatako yo ulhikachiya
muulhuvani, paahi etu kila nlhopwana akhal-
heke ni mahanu awe mwanene ni kila nthiyana
akhalheke ni owannyawe.

³ Nlhopwana apangeke chinophwanelhiya up-
anga wa mahanu awe ni nthiyana uyo apangeke
chinothananiya awe upanga wa owannyawe.

⁴ Nthiyana kharina ikuru vachulhu iruttu awe,
nansho owannyawe ahaana ni nlhopwana uyo
chiichammo, kharina ikuru vachulhu iruttu awe
nansho mahanu awe phirina.

5 Nhithuwane, yaahikhale mweewananaka mwaashineneru wiira chiicho wo nipesha nikani, mwoorie upatta nipesha noombone no unlhapelha Nlhuku. Mwamalhaka nhokolhelhaneke chitema, Nakare hiwe o ulhikachani wo nlhatu no uhichooria winyu wiichinanelha.

6 Nna nlhove kinohimia aka vano nna ikano, kuhiwena malhehero.

7 Kaanothanana wiira attu onkhaye akhalheke thoko mii chiriaka nansho kila mmoka hanaa mahalha avaheriye awe ukhuma wa Nlhuku mmoka vaheriye ilha ni ntu nkina vaheriye ilhe.

8 Paahi, alhe ahinathelhiya ni alhe akhwelhiye manyowannyaya kinaahimeria wiira athepeke ukhalha wo uhithelhiya ama uthelha thoko mii.

9 Nansho inakhalhaka chiicho, nlhopwana aahorieke wiichinanelha, paahi etu athelheke ukhalhawaya irii mbaya chinene uthelha kuliko ukelhiya itama.

10 Wa attu athelhanne alhe kihanaa malhehero, tho ahikhalkaka awaka, nansho ya Athithi, nthiyana himwalhaane ni owannyawewe

11 nansho amwalhaanaka, paahi ahalheke wo uhithelhiya ama etu, eewananihiyeke ni owannyaya. Nlhopwana ni uyo himwalhaane ni mahantu awe.

12 Wa attu akina alhe, mii kimwanene kuhiwe Athithi, kineera choo, Yakhalkaka munnihu nrumelhenhe Kuristo hanaa ahanu awe ahinarumelhelha, ni uyo nkaattuna ukhalha ni ayo, aakhalhaneke etu, himmwalhaane.

13 Vavawo tho, yakhalkaka nthiyana nrumelhenhe Kuristo hothelhiya ni nlhopwana hinanrumelhelha Kuristo ni uyo nlhopwana uyo hottuna ukhalha ni ayo, paahi etu nthiyana uyo himwalhaane ni owannyawe ayo.

14 Ukhalkhawaya nlhopwana hinanrumelhelha Kuristo uyo nohapihiya uhilhoka wawe wo ulhutaana ni mahanu awe ni uyo nthiyana o uhirumelhelha noteelhihiya wa Nlhuku wo unlhoko ni owannyawe. Wo iphiro ikina achishaana ayo khayaakhalha ashaana a Nlhuku nansho vano phi attu awe Nlhuku.

15 Nansho yakhalkaka ulhe o uhirumelhelha nothanana unhiya ntunananawe nrumelhenhe Kuristo, paahi etu anhiyeke. Vavawo nlhoko ihu nrumelhenhe Kuristo uyo, nlhopwana ama nthiyana nookhalha wo uhittukiya. Ukhalkhawaya Nlhuku howiihanani mwaattiva mpangkiye o ukhalha ni mpuha.

16 Inyuva amanyi munrumelhenlhe Kuristo va, nnooria chani ukhalha ni ikekhiaye wiira khannooria woopolha owannyu? Ama inyuva thithi nri Akuristo va, nnooria chani ukhalha ni ikekhiaye wiira khannooria woopolha ahanu inyu?

Nkhalheke thoko chiihaniye inyu ni Nlhuku

17 Nansho yakhalkaka ntu khaneenelhiya nkeehaniya ni Athithi, akhalheke thoko chiru awe wo uhinelhiya. Alha phi malhove anolhehera aka wa attu anrumelhenhe Kuristo onkhaye.

18 Yakhalkaka ntu heehaniya ni Nlhuku neenelhiye unyawo, paahi hilhikache

wiirukunusha wiira kheenelhiye ni vavawo yakhalkaka ntu ehaniye nari hineenelhiya, paahi etu hiinelhiye.

¹⁹ Ukhalhawayaya wiinelhiya unyawo ama uhiinelhiya khave ittu, ittu yuulhupalhe irii uvara malhehero a Nlhuku.

²⁰ Paahi, kila mmoka akhalheke thoko chaari awe ikatema yeehaniye awe ni Nlhuku.

²¹ Chani, inyuva mwaari ipotta ikatema yeehaniye inyu? Aye, nhikelhiye nipampa nansho mwapattaka nipesha no uneethi ntumiyeke.

²² Ukhalhawayaya ntu ehaniye ni Athithi nari ipotta uyo, yoyo nookhalha neethi wa Athithi. Phi chiichammo ni uyo ehaniye nari neethi, nookhalha ipotta ya Kuristo.

²³ Mwaatti onkhaye mwoopolhiye wo nhakhu paahi etu nhikhalhe tho ipotta cha attu.

²⁴ Ashilhoko aka, kila mmoka inyu ahalheke ni Nlhuku thoko chaari awe ikatema yeehaniye awe.

Inaacha athupa ni manyopani akhwelhiye ni manyowannyaya

²⁵ Vano, wo mwaha unaacha manyaathiyana ahinaatameriya ni athupa, akirina malhehero ukhuma wa Athithi nansho kinokumiha nlhove naka mii, kivaheriye wo ikiriri cha Athithi ukhalha o ukhulhuvelhiya.

²⁶ Paahi, wo nlhatu wo uhuva urii vano, kinoona yanlhoka ntu ukhalha thoko chiri awe.

²⁷ Chani, nhothelha? Paahi, nhithanane umwalhaana ni mahantu inyu. Inyuva khanthenlhe? Paahi, nhithelhe.

²⁸ Nansho mwathelhaka khannowonya ni mwalhi athelhiyaka khanowonya. Attu anohalha uthelhana ayo anoopatta itatako cho velhaponi va, nansho mii kaathanana wiira yayo ahupatteni mwaattiva.

²⁹ Ashilhoko aka, kineera choo, ikatema ihanlhe ihokhuviaa. Ni toka vano attu athenlhe akhalheke thoko khathenlhe,

³⁰ attu anonlha akhalheke thoko khanonlha, ni attu anteehiya akhalheke thoko khanteeliya ni attu anothuma akhalheke thoko khaarina ittu

³¹ ni attu arii ni mitheko cho velhaponi va akhalheke thoko khaarina choopanga chinene ni ayo, ukhalhawayaya ilhapo ilha, thoko chinochuwelha ihm, inoovira.

³² Nansho kinothanana mwaatti nhikelhiye nippampa. Ntu hinathelha naachenjeukelha Athithi iphiro chinohalha awe waateelhiha Athithi.

³³ Nlhopwana thenlhe nochenjeukelha chittu cho velhaponi iphiro chinohalha awe waateelhiha nrima mahantu awe,

³⁴ ni uyo homianiaa. Nthiyana hitelhiye ama nthiyana hinaatameriya ni nlhopwana nochenjeuka ni malhove a Athithi wiira ekumihe iruttu ni nrima awe akhalhe ntakatifu. Nansho nthiyana thelhiye nochenjeuka ni malhove o velhaponi va, iphiro chinohalha awe waateelhiha owannyawee.

³⁵ Kinoohimeriani chommo wo ifaida inyu, mena kuhiwe wo wuchiichihani. Kinothanana wiira nkhalheke o ulhokalhoka, wiira mwaattumikelhe Athithi wo uhimianiaa.

³⁶ Yakhahaka nlhopwana nowoona wiira khanompangelha rata nthiyana mwalhi nvekilhe

awe wo uhinthalha hoolhuvalha ni yakhalkaka itama chawe chinommulhusha, apangeke etu chinothanana awe, athelhaneke tu khanowonya.

³⁷ Nansho yakhalkaka nlhopwana uyo attunaka wo uthanana mu nrimani mwawe uhithelha kharina nlhatu, ni vavawo ooriaka utawara machiri o itama chawe ni uchuwelha iphiro yo upanga, paahi, hopanga rata chinene ahinthalheke uyo ntunanawe hinaatameriya uyo.

³⁸ Paahi wo malhove makina, ntu nothanana uveka ulhe nopanga yorera ni ulhe nohalha wo uhithelha nopanga morera chinene.

³⁹ Nthiyana thelhiye noottukiya ni owannyawe wo ikatema yonkhaye owannyawe vanokhalha aya akumi. Nansho owannyawe akhwaaka, yayo opaani ayo ahohiyereriya, attunaka anowooria uthelhiya ni ntu riyoote, nansho akhalheke ntu arumelhenlhe Athithi.

⁴⁰ Nansho, chinoona aka mii anooreeriya chinene akaakhanlhe chiicho thoko chiri aya. Yayo phi noonaka mii uno kaanyiheraka ni mii chiicho kihanaa Iphumu ya Nlhuku.

8

Mwaha wo cholhia chilhapelhiye mashoka

¹ Vano mwaha unaacha isadaka yo cholhia chilhapelhiye mashoka. Nihochuwelha wiira hiyaano onkhaye va nihanaa irusho, nansho irusho chiyo chinowaapanga attu yeeshipe nansho uttuna phi notheka.

² Ntu eeraka wiira hochuwelha ittu, wo ikekhiaye khachuwenlhe ittu iriyoothe thoko chinothananiya awe.

³ Ntu anttunaka Nlhuku, Nlhuku ni uyo nonchuwelha yoyo ntu uyo.

⁴ Paahi etu, mwaha unaacha isadaka yo cholhia chilhapelhiye mashoka, nihochuwelha wiira we ikekhiaye mashoka khave ittu velhaponi va ukhalhawaya nihochuwelha wiira Nlhuku ri mmoka tu.

⁵ Ata yakhalkaka wiira chihaawo chittu chinneehaniya milhuku velhaponi ama wiirimu, ni ata akhalhaka thoko chihawo milhuku ni manyaathithi enchi,

⁶ nansho uwanihu hii Nlhuku rii mmoka tu, Athumwanihu Oopilhe chonkhaye rii wo nlhatu nawe hii nihawo. Tho Athithi arii amoka tu, Yesu Kuristo, rii wo iphiro awe chittu chonkhaye chahoopiya, ni hii ninolhokelha wo iphiro awe.

⁷ Nansho, kuhiwe kila ntu chuwenlhe ulha mwaha ulha. Ukhalkawaya ahawo attu akinna alhemalhenlhe ulhapelha mashoka, attu arii mpaka nna vanolhia aya yeyo isadaka yo yolhia iyo anoona thoko chiholhapelhiya mashoka. Ni ukhalhawaya mirima chaya chihoochaa, anookelhiya nsheru.

⁸ Nansho yolhia khinooria unaatameriha chinene wa Nlhuku. Naahilhieke khaninowukuwelhiya ittu, nalhiaka khaninonchereriya ittu.

⁹ Nansho, mmweheke rata cholhia chinolhia inyu, ikuru ihu ilha ihaapange arii ni nrima mwankani awulhuwe mu uwonyani.

¹⁰ Ukhalhawaya, ntu o nrima wo uhuperia, owoonakani inyuva nrri ni irusho nlhiaka isadaka yo yolhia chiyo nnupani mwo ulhapelhiya mashoka, chani, khannonhelha nrima ni uyo wo ulhia cholhia chilhapelhiye mashoka?

¹¹ Chiicho, nhima inyu o nrima mwankani uyo, Kuristo nkhwenlhe awe wo nlhatu nawe, noopotera wo nlhatu no irusho chinyu.

¹² Yakhalhaka nnowaawonyiha achihima inyu yevo iphiro iyo, ni urakalhiha nrima waya wo uhuperia, ni inyu nnonttekelha Kuristo ni achihima inyu.

¹³ Wo chiichammo etu, yakhalhaka yolhia inommulhusha nhima aka, akinokhuura inama tho mahuku o uhimalha, ukhalhawaya kalhiaka kinommulhusha Kuristo ni ummulhusha nhima aka mu uwonyani.

9

Malhove anaacha mitheko cha Akarumiya

¹ Chani, mii akihiwe neethi? Chani, mii akihiwe karumiya? Chani, mii akimwoonne Yesu, Athithi? Chani, mwaattiva kanhiwe phi mahalha o ntheko aka wo nlhatu wa Athithi?

² Ata yakhalhaka wiira wa attu akina mii akihiwe karumiya, nansho uwaninyu mwaatti mii karumiya. Ni inyu mwaatti phi o himiechesha urumiya waka wo nlhatu no ulhutaana winyu na Athithi.

³ Nlhove naka no uwaahukumulha attu anokivinga phi nna,

⁴ Chani, hii khanirina ikuru yo ulhia ni uwuria?

5 Chani, khanirina ikuru yo waakusha manyaa-hanu ihm anrumelhenle Kuristo munkwahani mwihu, thoko chinopanga aya akarumiya akina ni ashilhoko aya Athithi ni Nakefa chiicho?

6 Ama ni mii tu ama Nabanaba ari ni ikuru yo uvara ntheko ni upatta mahalha ihm?

7 Chani, nsikari ani neelhivelha ntheko awe? Namalhima ani hinolhia izabibu cho mmatani mwawe? Nshunga ani hinowuria mapelhe o mihuwo chaweh?

8 Chani, kinoolhumacha alha malhove alha wo ikuru yo munttuniru? Chani, Malhehero a ashinna Musa ni iyo khineera chiicho?

9 Ukhahlawayaya Malhehero a ashinna Musa aholhepiya wiira, "Nhittuke iyano ing'ope vanokhungura aya cholhia." Chani, niireke Nhuku noochenjeuka ni ing'ope?

10 Chani, hii khanopuwenlhe veerilhe awe chiicho? Eiyo, alha aalhepiye wo nlhatu nihu, ukhalhawayaya ulhe nolhima ni ulhe nokhungura, onkhaye oyelhi ahaana nrima wo ukhulhuvelha upatta mahalha.

11 Yakhalkaka etu hii nihaalha imbeyu yo munnepani munlhokoni mwinyu, chani, khavanolhoka chinene nakhunguraka ifaida ukhuma mwiirutti mwinyu?

12 Yakhalkaka akina anoweherera ukaviha winyu mwaatti, chani, hii khanirina ikuru chinene waapwaha yayo?

Nansho, hiyaano khanatumilhe wowo up-hwanelhiya uwo. Utulhi waya, nihovilhelha kila ittu wiira nihitiyelhelhe Malhove Orera a Kuristo.

13 Chani, khanchuwenlhe wiira attu anovara ntheko u Inupa ya Nlhuku anopatta malhivo o ntheko waya ni attu anokumiha isadaka chaya umadhubahuni anoopatta ittu ukhuma yeo isadaka iyo?

14 Athithi yaholhehera chiicho wiira attu anohimiacha Malhove Orera a Nlhuku apatteke ittu yo waakavihera mommo.

15 Nansho, mii akitumiilhe ata ittu imoka wo yayo malhove ayo. Ni mena akinolhepa wiira kipatte chechiyo chittu chiyo. Uwannyaka mii, nambaya ukhwa kuliko uchiichihiya ni ntu riyoothe wiishipa uneeshipa aka.

16 Yakhalkaka kinoohimiacha Malhove Orera, yoyo kuhiwe nlhatu wo wiifunelha, yoyo phi ntheko uvahiye aka. Nansho kinoothapana mii kaahihimiacheke Malhove Orera!

17 Yakhalkaka kahovara ulha ntheko ulha wo uttuna waka, paahi, kaanoweherera malhivo nansho wo uhittuna waka, yeo phi ipilhi kirumelhelhiyaka ni Nlhuku wiira kivare.

18 Malhivo aka phi ishiyani etu? Malhivo aka phi nipesha kivahiye aka no uhimiacha Malhove Orera wo uhilhiviya, wo uhikohererera malhivo o ikuru aka yo uhimiacha Malhove Orera.

19 Ihookhalharu mii akipangiyie ipotta yo ntu riyoothe, kiheepanga ukhalha ipotta yo kila ntu wiira kimpattelhe Kuristo attu enchi inooriacha aya.

20 Wo Ayahudi kaakhanlhe thoko Nyahudi wiira kaapatte Ayahudi, ihookhalharu akino-tawariya ni Malhehero a ashinna Musa ki-heechesha wuuthi Malhehero uwannyaya, wiira

kaapatte alhe arii atawariyaka ni Malhehero a ashinna Musa.

21 Ni wo alhe ahinotawariya ni Malhehero a ashinna Musa alhe, kinokhalha thoko yayo, wo uhitarwariya ni Malhehero, wiira kaapatte o uwonya ayo, anotawariya ni Malhehero ayo. Ilha kiheena wiira mii akinotawariya ni Malhehero a Nlhuku, ukhalhawayaya kihovariya ni Malhehero a Kuristo.

22 Wa attu arii o nrima mwankani kiheepanga ntu o nrima mwankani thoko yayo chiri aya wiira kaapatte alhe arii ni nrima mwankani. Kihopanga kila ittu wo nlhatu no attu onkhaye wiira koopolhe akina aya wo kila iphiro.

23 Kinopanga chonkhaye chii wo nlhatu no Malhove Orera, wiira kikavihane upatta ibarakha chaya.

24 Chani, khanchuwenlhe wiira mpuwani nnothweelhiya mihapo, ihookhalharu attu enchi phi nottawa nansho ntu mmoka noholhelha phi nottuviya. Nttaweke chiicho ni inyu nttuviyi.

25 Attu ottawa vaneechesha aya rata anaatakanelha wiira apatte nttuovo ninotanganyiaa! Nansho hii ninopanga chiicho wiira niwarihiye mphumburu uhinothaalha.

26 Phi chiichammo etu, kinottawa thoko ntu o itama yo upatta nttuovo, phi chiichammo etu kinaatakana thoko owatakana hinokufia ikhwipi chawe vahiri ittu.

27 Nansho kinoohuviha iruttu aka kimwanene ukhalha ipotta aka, kinopanga chiicho kihewe mii kimwanene kaakhotiya vanomalhiha aka waahimiachera attu akina Malhove Orera.

10

Waamukiya mwaha wo ulhapelhiya mashoka

¹ Ashilhoko aka, kinothanana nchuwelheke wiira manyaapwiihu onkhaye yaari wuuthi nihute nne, ni wiira onkhaye yaholhapuwa rata ibahari ilhe.

² Onkhaye yahobatiiziya wo ulhutaana ni ashinna Musa nnihuteni mmwe ni nhina ibahari ilhe.

³ Onkhaye yaholhia yevo yolahia yo munnepani iyo,

⁴ tho nkayawuria chiicho yo uwuria yelhe yo munnepani ilhe, ukhalhawayaya yawunrie ukhuma mwalha wo munnepani waattwarilhe ulhe, yoyo mwalha uyo waari Kuristo mwanene.

⁵ Inakhalkaka chiicho, enchi aya khayantelhinhe Nlhuku, ni mitembo chaya chahomwarushiya uthakoni.

⁶ Paahi etu, malhove onkhaye ayo phi olhikaanihiya uwanihu wiira anaamuke hiyaano nihithanane ukhalha attu o uhilhoka thoko chenre aya wo uthanana yayo manyaattu ayo.

⁷ Mena nhikhalhe attu o ulhapelha mashoka thoko chinohimiya ni Malhove Matakatifu wiira, “Attu yahokhalhacha nkayaalhia ni uwuria, nkayeemelha ni wiinacha chittu cho unanara.”

⁸ Mena nihiluve thoko chaalhuwilhe aya, nkayaakkhwacha attu 23,000.

⁹ Mena nihinlhikache Kuristo thoko chaalhikanche aya attu akina, nkayaalhumachiya inwaa, nkayaakkhwacha.

¹⁰ Mena nhichukulhe thoko akina chenre aya wo uchukulhacha, nkayeevakachiya.

11 Paahi, yoyo mwaha waapattilhe uyo phi meettuchiho uwanihu, ni ayo yaalhepiye wo nl-hatu no unaamuka hiyaano nipochenre utimira ni umalha wo ikatema.

12 Ntu naanyihera wiira heemelha rata, paahi etu akhalheke miitho hiwulhuwe.

13 Ulhikachiya umanlhe inyu upatta phi wo mahuku ene wa attu. Nlhuku ri o ukhulhuvelhiya, khanoohiyani wiira nlhikachiye upwaha wooria winyu. Nansho vamoka ni ulhikachiya uwo nouvahani chiicho machiri o uvilhelha ni iphiro yo ukhuma muulhikachiyani mmo rata.

14 Paahi etu, manyampwana kinaattuna aka, nshembeke mwaha wo ulhapelha mashoka.

15 Kinoolhumacha ni mwaattiva, attu nrri ni irusho, nchuwelheke mwaashinene malhove anoolhumacha aka ayo.

16 Vanontotopelha ihu Nlhuku wo ikikombe yo ibarakha ilhe, chani, khaninolhutaana ni iphome ya Kuristo? Vanomia ihu nkatte, chani, khani-nokhalha nlhoko mmoka ni iruttu ya Kuristo?

17 Ukhalhaway a nkatte uyo urii mmoka, in-akhalhaka hii nirii enchi, nirii iruttu imoka, ukhalhaway a onkhaye ninomiana yoyo nkatte mmoka uyo.

18 Mwooneke attu o Israeli chiri aya wo ulhutaana ni Nlhuku, attu anolhiacha isadaka chikumihiye umadhubahuni. Chani yayo khanokayiha mitheko cho madhubahuni unokumihiya isadaka?

19 Paahi kuulhumacheke ittu yaani? Chani ki-ireke wiira yolhia ikumihkiye isadaka wa Nlhuku phi ittu yo maana upwaha yolhia ikina? Ni mashoka ayo chani phi ittu yo maana?

20 Ata vakani! Inoolhumacha aka irii wiira isadaka cha attu ahinchuwenlhe Nlhuku chinokumihiya ni uvahiya mashoka, kaheena Nlhuku. Akinottuna mena wiira mwaattiva nkavihane ni mashoka.

21 Khannooria uwureria ikikombe ya Athithi uno mmwureriaka ikikombe yo mashoka, khannooria umiana vamoka ni Athithi ni ulhia vamoka ni mashoka.

22 Ama chani, ninothanana waapanga Athithi akhalhe o ihache? Nnaanyihera wiira nihanaa machiri chinene waapwaha yayo?

Kila ittu irii wo nthimicho wa Nlhuku

23 Chittu chonkhaye khachinochiichihiya, nansho khachihewe chonkhaye chinorera. Chittu chonkhaye khachinochiichihiya nansho khachihewe chonkhaye chinotheka.

24 Ntu haavie ifaida awe mwanene, nansho aavieke mahalha a akhunanawe.

25 Nkhuureke inama iriyootho inothumihya usokoni wo uhikohakoha wo nlhatu no mirima chinyu.

26 Ukhahawaya Malhove Matakatifu aneera, “Ilhapo ni chittu chonkhaye chiriwo phi nhakhu wa Athithi.”

27 Yakhahaka ntu hinrumelhenlhe Kuristo noulhalhiani mwaattiva ni inyu nkamwaarwaa, paahi, nlhieke inama chonkhaye chinolhoha awe uterekhelhani wo uhikohakoha wo nlhatu no mirima chinyu.

28 Nansho yakhahaka ntu nowiira, “Ilha inama ilha ihokumihiya ikhalhe isadaka yo ulhapelhiya mashoka.” Paahi, wo nlhatu wo nrima wawe uyo ohimenrieni chiicho uyo nhilhie.

29 Mii kineera wo nlhatu no nrima kuhena nrima winyu, nansho nrima awe uyo ohimen-rieni uyo.

Nlhatu waani etu, uneethi aka uhukumulhiye ni nrima wa ntu nkina?

30 Yakhahaka mii kinonshukuru Nlhuku wo yolhia inolhia aka, nlhatuni etu no uruwaniya wo mwaha wo yolhia irii wo nlhatu waya kihon-shukuru Nlhuku?

31 Paahi, ittu iriyoothe inopanga inyu ikhalhe ulhia ama uwuria, mpangeke chonkhaye wo nlhatu no unthimicha Nlhuku.

32 Nhikhalhe nlhatu wo waattekiha Ayahudi ama Ayunani ama attu arumelhenlhe Athithi Yesu Kuristo.

33 Nkhalheke thoko chiri aka mii, kinool-hikacha unteelhiha kila mmoka wo kila iphiro, wo uhaavia ifaida aka kimwanene nansho ifaida ya attu onkhaye, wiira oopolhiye.

11

1 Nkithakiheke mii thoko mii chinonthakiha aka Kuristo.

Ukhuneelha muru ikatema yo unlhapelha Nlhuku

2 Kinowutotopelhani wo nlhatu no ukupuwelha ni wo nlhatu no uvarechesha meettuchiho yuvahilheakani alhe.

3 Nansho kinothanana nchuwelheke wiira Kuristo phi muru vachulhu wo kila nlhopwana ni nlhopwana phi muru vachulhu wo mahantu awe ni Nlhuku phi muru vachulhu Kuristo.

⁴ Paahi, kila nlhopwana nolhapelha ama rii namilhohi a Nlhuku uno neekhunenhe muru awe, yoyo noveehacha muru awe.

⁵ Ni nthiyana alhapelhaka ama namilhohi a ntenga wa Nlhuku wo uhikhunelha muru, naaveehacha owannyawe, nthiyana nopanga chiicho nokhalha thoko nthiyana hammee ikarari chawe.

⁶ Nthiyana hinokhuneelha muru awe, ambaya ahameke ikarari chawe. Nansho inowulhihacha muru nthiyana ahamaka ikarari chawe ama uhamiya, paahi ambaya etu akhuneelheke muru awe.

⁷ Khinolhoka nlhopwana wiikhuneelha muru awe, ukhalhawaya yoyo phiri thoko Nlhuku ni nthimicho wa Nlhuku nansho nthiyana phi nthimicho wa nlhopwana.

⁸ Nlhopwana khaakhumilhe wa nthiyana, nansho nthiyana aakhumme wa nlhopwana.

⁹ Nlhopwana khoopiye wo nlhatu no nthiyana, nansho nthiyana oopiye wo nlhatu no nlhopwana.

¹⁰ Paahi etu nthiyana akhuneelheke muru awe, ikhalheke ittu yo wooniha ikuru irii vachulhu vawe ni tho wo nlhatu no minepa o wiirimu.

¹¹ Nansho ata inakhalhaka chiicho, uhollo wa Athithi khaawo nthiyana wo uhikhalha nlhopwana, ni uyo nlhopwana khanokhalha wo uhikhalha nthiyana.

¹² Ukhalhawaya thoko nthiyana chikhumelhenhe awe wa nlhopwana ni chiichammo nlhopwana noyariya ni nthiyana, nansho kila ittu inokhuma wa Nlhuku.

¹³ Nhukumulheke mwaashinene, Chani,

iholhoka nthiyana unlhapelha Nlhuku wo uhikhunelha ittu mmuruni?

¹⁴ Ata moopelho anene ari aya anooniha mwaari wiira wo nlhopwana ukhalha ni ikehrari cho urekama inomuulhihacha muru mwanene,

¹⁵ nansho wo nthiyana ukhalha ni ikehrari phi ittu yo nthimicho uwannyawe, vahiye ikehrari cho urekama wiira chinkhuneelhe.

¹⁶ Yakhalhaka ntu nothanana uwiiha mwaha wo uvaanyihana vachulhu ulha mwaha ulha, paahi achuwelheke wiira hiyaano khanirina malhemalhelho makina mena attu a Nlhuku anrumelhenlhe Kuristo kharina malhemalhelho makina.

Yolhia ya Athithi

(Mat 26:6-29; Mako 14:22-25; Luk 22:14-20)

¹⁷ Vanouvahaakani malhehero alha, akinooria utotopelhani ata vakani. Ukumaana winyu mwaatti anrumelhenlhe Kuristo, unowiiha chittu cho ulhoka nansho unowiiha uhilhoka.

¹⁸ Wo uchokholha, kiheewa wiira vanokumaana inyu vamoka attu anrumelhenlhe Kuristo, uhiiwanana unoookhumelhelha variyari inyu. Ni mii kinorumelhelha vakani.

¹⁹ Ukhalhawaya anookehumelhelha malhove ovirikanacha munlhokoni mwinyu, wiira alhe arumelhelhiye we ikekhiaye achuwanie.

²⁰ Eiyo we ikekhiaye nnokumaana, nansho kuhena wo nlhatu no ulhia yolhia ya Athithi!

²¹ Ukhalhawaya vanolhia inyu kila mmoka nokhalhelha yolhia awe mwanene wo uhaawehherera attu akina. Ata inokhumelhelha wiira attu akina ahalhaka ni ithalha, ni attu akina anahapalhiye!

²² Chani, khannooria ulhia ni uwuria mmanupani mwinyu? Ama chani, nnoveehacha nlhoko wa attu a Nlhuku ni wolhihachiha muru ayo ahirii ni ittu ayo? Kuhimeriekeni ittu yaani? Kuushipeni? Mena! Ata mena, kuhena wo ulha mwaha ulha.

²³ Ukhalhawaya mii kahopochera ukhuma wa Athithi nlhove kovahilhe akani, wiira yolhe uhiyu ulhe Athithi Yesu vaathomihiyе aya, ahokusha nkatte

²⁴ nkayanshukuru Nlhuku, nkayaamia, nkayeera, "Ilha phi iruttu aka ikumihiye wo nlhatu winyu, mpangeke chiicho wo ukuupuwelha."

²⁵ Chiichammo vaamanlhe aya ulhia nkatte yahokusha ikikombe nkayeera, "Ilha phi ikikombe yo Malhehano o Naanano o iphome aka, mwireke chiicho kila vanohalha inyu uwuria wo ukuupuwelha."

²⁶ Ukhalhawaya kila vanolhia inyu ulha nkatte ulha ni uwureria ilha ikikombe ilha, nnoonhimicha nookhwa a Athithi, mpaka vanohalha aya uwa.

²⁷ Paahi etu, kila ntu nolhia yoyo nkatte uyo ama nowuria ikikombe ya Athithi vahinothananiya, nootteka wo nlhatu no iruttu ni iphome ya Athithi.

²⁸ Paahi kila ntu akhalheke ni wiikoha mwanene hinaaya ulhia nkatte ni uwuria yevo ikikombe iyo,

²⁹ ukhalhawaya ntu riyoothe nolhia ni uwuria wo uhichuwelha ikekhiaye yo iruttu ya Athithi, nolhia ni uwuria ihukumu awe mwanene.

³⁰ Yoyo phi nlhatu wa attu akina munlhokoni mwinyu ukhalha ohuperia ni akina areta ni

akina ukhalha o ukhwa.

³¹ Yakaari naheechuwelha we ikekhiaye, khanaahukumulhiya chiicho.

³² Nansho vanohukumulhiya ihm na Athithi nineettuchihiya ukhalha ni irusho wiira nihiwe naahukumulhiya vamoka ni ilhapo.

³³ Paahi etu ashilhoko aka vanokumaana inyu ulhia yolhia ya Athithi, kila mmoka anlhiteke nkhunanawé.

³⁴ Ntu wolhiye ithalha alhieke uwannyawe wiira ukumaana winyu uhiwiihe ihukumu. Nansho wo mwaha wa makina alhe kinoowa koolherani vanohalha aka uwa.

12

Uvaheriya ni Iphumu ya Nlhuku

¹ Ashilhoko aka, vachulhu mahalha o munnepani, kinothanana nchuwelheke rata alha malhove alha.

² Nhochuwelha wiira, vaari inyu attu ahinchuwenlhe Nlhuku, mwaaholhelhiya ni upoterihiya ni isinyago chihiri ni ukumi.

³ Paahi, nchuwelheke wiira ntu riyothe noholhelhiya ni Iphumu ya Nlhuku khanooria wulhumacha wiira, “Yesu alhaviye!” Ni chiichammo, ntu riyothe hinoholhelhiya ni Iphumu ya Nlhuku khanooria wiira, “Yesu phi Athithi.”

⁴ Mahalha o Iphumu ya Nlhuku ari menchi, nansho Iphumu ya Nlhuku rii mmoka.

⁵ Iphiro cho ukaviha ntheko wa Athithi chiri chinchi nansho Athithi arii amoka.

⁶ Chihawo iphiro chinchi cho uvara ntheko, nansho Nlhuku rii mmoka, nooriha mitheko chonkhaye mwa attu onkhaye.

⁷ Iphumu ya Nlhuku neepatakulha wa kila ntu wo ifaida ya attu onkhaye.

⁸ Iphumu ya Nlhuku nommaha ntu mmoka ntenga wo irusho, ni ummaha ntu nkina mahalha o uchuwelha chittu, chinothanana aya yeo Iphumu ya Nlhuku uyo.

⁹ Iphumu ya Nlhuku yoyo nommaha ntu mmoka nrima, ni ummaha ntu nkina mahalha o waalhamiha attu.

¹⁰ Tho inommaha ntu mmoka mahalha o upanga cho ushangiha, nkina mahalha o anamilohi, nkina mahalha o ulhamulha mahalha anovahiya ni Iphumu ya Nlhuku ni nlhoko wo chittu chihiri cho Iphumu ya Nlhuku, nkina mahalha o uchuwelha nulhumo nilheto ni nkina mahalha o ulhamulha nulhumo nilheto.

¹¹ Chechiyo chonkhaye chiyo phi mitheko cho yeo Iphumu ya Nlhuku mmoka uyo. Nommaha kila ntu mahalha ovirikanacha, thoko chinothanana awe mwanene.

Itturi chiri chinchi, nansho iruttu irii imoka

¹² Thoko iruttu chiri aya imoka yo itturi chinchi, ni itturi chiyo chonkhaye ihokhalharu chiri chinchi phi nopanga iruttu imoka, phiri aya chiicho wa Kuristo.

¹³ Ukhalhawayaya hiyaano, nakhalhaka Ayahudi ama Ayunani, ipotta ama aneethi, onkhaye nibatiiziye wo Iphumu ya Nlhuku mmoka mu iruttu imoka iyo ni onkhaye nahompochera Iphumu ya Nlhuku mmoka uyo.

14 Ukhalhawaya iruttu khirina itturi imoka vekha, nansho irina itturi chinchi.

15 Yakhalhaka etu mweto waaneera, “Ukhalhawaya mii akihiwe moono, paahi mii akihiwe nhakhu wo iruttu.” Chani, waanohiya ukhalha itturi yo iruttu? Mena!

16 Yakhalhaka nnyaru naaneera “Ukhalhawaya mii akihiwe niitho, paahi etu mii akihiwe nhakhu wo iruttu.” Chani, wo nenneo nlhove nno nanhiya ukhalha itturi mwiiruttuni? Mena!

17 Iruttu yonkhaye yakaari niitho, wiiwa ukaari vayi? Ni iruttu yonkhaye yakaari nnyaru, ntu akonrie chani unukha?

18 Nansho Nlhuku ahoopa itturi kila imoka mwiiruttuni thoko chaathanana awe.

19 Yakhalhaka itturi chonkhaye chakaari itturi imoka, iruttu ikaari vayi?

20 Ikekhiaye irii wiira, itturi cho iruttu chiri chinchi, nansho iruttu inokhalha imoka.

21 Paahi, niitho khaninooria wiirelha moono, Akinothanananani inyuva mena muru khunooria wiirelha mieto, Akinothanananani mwaattiva.

22 Anthepa vavawo, inoonia wiira itturi cho iruttu chinoonia ukhalha cho uhuperia chilhe phi chiyo chiri cho ukhulhuvelhiya chinene.

23 Tho, itturi cho iruttu chinaanyihera ihu ukhalha cho uhiphwanelhiya uthimichiya chinene chilhe, phi chiyo chinoothimicha ihu chinene, ni itturi chihinoonihiya waattuni phi noshungiya chinene,

24 uno itturi chickina khachinothananiya ul-hohiya. Nlhuku mwanene hoopaa iruttu wo iphiro chinothanana awe, nkaahelha nthimicho

chinene itturi iwukuwelhiye nthimicho ilhe,

²⁵ wiira uhikhalle umwalhaana mwiiruttuni,
nansho itturi chonkhaye chihimelhelhaneke
chineneru.

²⁶ Itturi imoka yarakalhaka, itturi chonkhaye
chihorakalha vamoka ni iyo. Itturi imoka yato-
topelhiyaka itturi chikina chonkhaye chinooteel-
hiya vamoka ni iyo.

²⁷ Paahi, mwaattiva onkhaye phi iruttu ya
Kuristo, kila mmoka inyu phi itturi cho yevo
iruttu iyo.

²⁸ Nlhuku haathanlha attu mmilhokoni mwa
attu awe, achokholhaka akarumiya, onayelhi
anamilhohi, o neraru owiittuchiha, amalhekeru
heesha alhe arii ni mahalha o upanga cho
ushangiha ni olhamiha ni okaviha ni aholhelhi
ni attu owulhumacha nulhumo nilheto.

²⁹ Chani, onkhaye phi akarumiya? Onkhaye
phi anamilhohi? Onkhaye phi owiittuchiha?
Onkhaye phi attu arii ni mahalha o upanga cho
ushangiha?

³⁰ Chani, onkhaye phi attu ari ni mahalha o
ulhamiha? Chani, onkhaye phi attu ari ni ma-
halha o wulhumacha nulhumo nilheto? Chani,
onkhaye phi attu anolhamulha nulhumo nilheto?

³¹ Nkhalheke etu ni nikakata no upatta ma-
halha o ukhulhuvelhiya chinene. Ni mii vano ki-
nowoonihani iphiro yoombone chinene upwaha
chilha chonkhaye chilha.

13

Uttunana

1 Ata kinolhumachaka nulhumo na attu ni ata no minepa, yakhalhaka akirina nrima wo uttuna, kinokhalha thoko ndebe no uhikhala ittu ama maruchulhu vanorumihya aya.

2 Thoni, kinakhalhaka ni mahalha o namilhoji a Nlhuku, nkakaachuwelha chivithiye chonkhaye ni uchuwelha kila ittu kinoworia ukhalha ni nrima mwinchi kaanooria ata uthamiha miako, nansho yakhalhaka akirina nrima wo uttuna, miyaano akihiwe ittu.

3 Kakumihaka nhakhu aka wonkhaye ni waavaha amashikini, tho kakumihaka iruttu aka wiira ipahiye vamooroni, nansho yakhalhaka akirina nrima wo uttuna kinopatta ittu iriyoothe.

4 Ntu ri ni nrima wo uttuna noovilhelha, nowaalhoha akina ri ni nrima wo uttuna kharina ihache, khaneechoona ama khaneefuna.

5 Ntu ri ni nrima wo uttuna khanhiya umanya, khanothotha ifaida awe, ama khanrushiya chitema mena khanoopuwelha chittu cho unanara chivinre,

6 khanottapelhelha chittu cho uhilhoka, nansho nottapelhelha chittu cho ikeekhene.

7 Ntu ri ni nrima wo uttuna noovilhelha chonkhaye, noorumelhelha, nookhulhuvelha chonkhaye ni winkelha chittu chonkhaye.

8 Uttuna khummalha mena. Yakhalhaka ahaawo mahalha o anamilhoji a Nlhuku, yayo anoopotera nihuku nimoka yakhalhaka ahaawo mahalha o wulhumacha nulhumo nilheto, anowuuma yakhalhaka uhaawo uchuwelha chittu ni chiyo chinoovira.

9 Ukhalhawayaya uchuwelha wihi khuntimira rata ni mahalha ihu o anamilhoji a Nlhuku

khanotimira rata.

¹⁰ Nansho alhe atiminre rata alhe, vanohalha
aya uwa ukhuma wiirimu, chonkhaye chihitim-
inre chinoothamihiya.

¹¹ Vaari aka mwanhima koolhumacha in-
amwane, kaachuwelha inamwane, irusho chaka
choopuwelha inamwane. Nansho vano, ukhalh-
awayaya ki ntu o wunnuwa, kihohiya malhove e
inamwane.

¹² Ukhalhawayaya chinoona ihu vano chiru thoko
ikhoveru ihinoonia rata mmaashini, nansho mi-
holho uwo ninoowa noona ikhove wo ikhove.
Vano kinochuwelha vakaniru, nansho miholho
uwo kinoowa kaachuwelha chonkhaye ratarata,
thoko Nlhuku vanokichuwelha awe.

¹³ Vano kinovarelha alha mararu alha, upisha
nrima ni ukhulhuvelha ni uttuna. Nansho nrima
wo uttuna phi thepilhe upwaha onkhaye.

14

Mahalha makina o Iphumu ya Nlhuku

¹ Mmindeke ukhalha ni nrima wo uttuna. Ni
chiichammo tho nkhalheke ni nrima wo upatta
mahalha makina o munnepani, hasa mahalha o
anamilhohi a Nlhuku.

² Ukhalhawayaya ntu nooria wulhumacha nul-
humo nilheto khanolhumacha ni attu nan-
sho noolhumacha ni Nlhuku, ukhalhawayaya wo
ikekhiaye khaawo neewa chinohimiya. Yoyo
noolhumacha malhove avithiye wo machiri o
Iphumu ya Nlhuku.

³ Nansho ri ni mahalha o anamilhohi a Nlhuku,
noolhumacha ni attu wo nlhatu wo waatheka ni
waamaalhiha ni waahelha nrima.

4 Ntu noolhumacha nulhumo nilheto neetheka mwanene. Nansho ntu rina mahalha o anamil-hohi a Nlhuku, naatheka attu anrumelhenlhe Kuristo.

5 Paahi, kinothanana mwaattiva onkhaye va muulhumacheke wo nulhumo nilheto. Nansho hasa kaathananne nkhalhe ni mahalha o anamil-hohi a Nlhuku. Ukhalhawaya ntu rina mahalha o anamilhohi a Nlhuku nowiiwiya chinene umpwaha ulhe noolhumacha nulhumo nilheto yaahikhalheke wiira haawo vavawo ntu nooria ulhamulha malhove anolhumacha awe, ikhalhe iphiro yo waatheka attu anrumelhenlhe Kuristo.

6 Wo chiichammo, ashilhoko aka, kawaaka uwaninyu ni wulhumacha nulhumo nilheto inolhoha ulhokani ittu yaani? Khinoolhokani ittu iriyoothe, yahikalheke koohimeriakani mwaha wo upatakulha wa Nlhuku ama cho mu uchuwel-hani ama nttenga wa Nlhuku ama meettuchiho makina.

7 Phiri aya wo ikerero chihiri chikumi chinorama thoko ampeta ama imbira. Chani, ntu nohalha uchuwelha chani nchipo nineepiya yakhalkaka ikerero chiyo khachinorama vanoopiya aya?

8 Tho nipalhapata narumaka wo uhiwaniaa, mpani nolhoha wiicheesha rata waatakana ikhoto?

9 Chiichammo ni inyu mwaatti, nlhimi ninyu naahoolhumacheke ittu yo wiiwania, mpani nohalha uchuwelha ittu inoolhumacha inyu? Malhove inyu anoopotera mphioni.

10 Ahaawo moolhumo menchi o kila nikoshovelhaponi va, ni mena khaniwo ata nimoka aya

nihirii no maana.

¹¹ Nansho yakhalhaka mii akirina ikuru yo uchuwelha maana o nulhumo ninoolhumacha awe ntu nkina, mii ki o uhishoma uwannyawee yoyo ntu uyo ni uyo chiicho o uhishoma uwannyaka.

¹² Chiichammo ni inyu mwaati, ukhalhawaya nhanaa nrima wo upatta mahalha o Iphumu ya Nlhuku, mmindeke chinene upatta chilhe chinothalha ukavihani waatheka attu anrumelhenlhe Kuristo.

¹³ Wo chiichammo etu, ntu noolhumacha nulhumo nilheto alhapelheke wiira oorie ulhamulha.

¹⁴ Ukhahawaya, kalhapelhaka wo nulhumo nilheto nrima aka phi nolhapelha, nansho irusho chaka chinoohalha wo uhimma ittu.

¹⁵ Kipangekeni etu? Kinohalha ulhapelha ni nrima aka, tho kinolhapelha ni irusho chaka, kinowiipa ni nnepa aka, tho kinowiipa ni irusho chaka.

¹⁶ Mwantotopelhaka Nlhuku wo nrima inyu vekha, anohalha wooria chani attu ahinachuwelha chittu arii vanokumaaniya waakhulha Aye, yakhalhaka khaneewa ittu inohimiya vanoshukuru inyu?

¹⁷ Ukhahawaya inyuva nnonshukuru Nlhuku wo ikekhiaye, nansho ntu nkina uyo khinomuncherera ittu.

¹⁸ Kinonshukuru Nlhuku wiira mii kinowulhumacha nulhumo nilheto wuupwahani mwaattiva onkhaye va.

¹⁹ Nansho unokumaana aya attu anrumelhenlhe Kuristo phi ninothanana aka chinene

wulhumacha malhove nthanu o irusho chaka wiira keettuchihe akina, kuliko wulhumacha malhove maelufu o nulhumo nilheto.

²⁰ Ashilhoko aka, irusho chinyu chihikalhe thoko ashinamwane. Vachulhu mwaha wo mu uwonyani, nkhalheke wo uhiwonya thoko ashinamwane ashinkani, nansho vanoopuwelha inyu vavawo nkhalheke thoko attu akhomanlhe.

²¹ Iholhepiya nhina Malhehero a ashinna Musa,

“Athithi aneera choo
‘Wo iphiro ya attu anoolhumacha nulhumo nilheto,

Ni wo malhaku a alheto,

Kinowoolhumana alha attu alha,

Inakhalhaka wiira, khanokiiwelhelha.’ ”

²² Chiichammo etu, mahalha o wulhumacha nulhumo nilheto phi nthonyero, nihikhalkaka wo nlhatu no attu o nrema, nansho wo nlhatu wa attu ahiri ni nrima. Ukhahawaya mahalha o anamilhoi a Nlhuku arii wo nlhatu no attu anorumelhelha ni mena kuhiwe wo nlhatu no attu o uhirumelhelha.

²³ Paahi, attu anrumelhenle Kuristo vanoku-maana aya vamoka, nkayaachokholha wulhumacha wo nulhumo nilheto, chani, vavawo yawaaka attu ahichuwenlhe nenne nulhumo nilheto nno, khanaanyihera wiira mwaattiva mwa attu o ihalhahalha?

²⁴ Nansho awaaka attu ahinachuwelha nulhumo nilheto nno ama o uhirumelhelha attu a Nlhuku vanohimiacha aya nttenga wa Nlhuku, malhove onkhaye anohalha aya wiiwa anowaachuwelhiha uhilhoka waya ni wiihuku-mulha ashineneru.

25 Chittu chivithiye mmamirimani mwaya chinnoohumbukulhiya, ni ayo anookhoroma ni unthimicha Nlhuku eeraka, “Wo ikekhiaye Nlhuku ri vamoka ni inyu.”

Iphiro cho ukumaana attu a Nlhuku

26 Ashilhoko aka, niireke chani etu? Vanoku-maana inyu vamoka, mmoka eepeke nchipo no unthimicha Nlhuku, nkina eettuchiheke, nkina akhalheke ni ittu yo upatakulhiya ni Nlhuku, nkina ooniheke mahalha o wulhumacha nulhumo nilheto ni nkina alhamulheke anoolhumachiya. Chonkhaye chikhalheke wo nlhatu wo waatheka attu a Nlhuku.

27 Yakhalkaka ahawo attu arii ni mahalha o wulhumacha nulhumo nilheto, yuulhumacheke attu elhi ama araru, ahithepe vavawo, tho olhumacheke mmoka mmoka, ni akhalheke ntu o ulhamulha anoolhumachiya ayo.

28 Nansho yakhalkaka khaawo nooria ulhamulha, paahi, owulhumacha nulhumo nilheto amaalheke vakumaaniye attu anrumelhenle Kuristo vawo, olhumacheke ni nrima awe mwanene ni Nlhuku.

29 Vachulhu yo alhe arii ni mahalha o anamilhoji o uhimiacha ntenga wa Nlhuku, yuulhumacheke attu elhi ama araru, ni akina achuwelheke rata malhove aya.

30 Yakhalkaka mmoka vanoolhumacha awe ntu nkina neewelhelha hopatakulhelhiya ukhuma wa Nlhuku, paahi ulhe noolhumacha ulhe amalhiheke ni ummaha nkhunanawe.

31 Ukhalhawayo onkhaye nnwooria ukhalla anamilhoji o uhimiacha ntenga wa Nlhuku,

mmoka khuwaaka nkina, wiira onkhaye mpatte ittu yo wiittucha ni uhelhiya nrima.

³² Ntu vaheriye nrima wo anamilhohi wo uhimiacha nttenga wa Nlhuku avarelheke yayo mahalha ayo.

³³ Ukhalhawayaya Nlhuku khanttuna injarare, nothanana mpuha.

Thoko chinre aya wo ulhemalhelha attu anrumelhenlhe Kuristo onkhaye,

³⁴ manyaathiyana amaalheke yii unokumaana aya attu anrumelhenlhe Kuristo. Kharina nipesha no wulhumacha nansho eetimarikheke thoko chinohimia aya Malhehero a ashinna Musa.

³⁵ Yakhalkaka ahanaa malhove o ukoha, yaakoheke manyaowannyaya mmanupani mwaya, ukhalhawayaya inowuulhiha muru nthiyana wulhumacha vaattuni unokumaana aya attu anrumelhenlhe Kuristo.

³⁶ Chani, nnanyihera wiira nlhove na Nlhuku nikhumilhe uwaninyu mwaattiva ama niwiilhe uwaninyu vekha inyu?

³⁷ Yakhalkaka ntu riyothe naanyihera wiira yoyo phi namilhohi a Nlhuku ama wiira hanaa mahalha o munnepani, achuwelheke etu wiira alhaanolhepa aka uwaninyu mwaattiva alha phi malhehero a Athithi.

³⁸ Ni attu ahinlhohe ntu hichuwenlhe yayo meettuchihiho aka ayo.

³⁹ Wo chiichammo etu, ashilhoko aka, nkhalheke ni nrima wo uthanana ukhalha anamilhohi o utangacha nttenga wa Nlhuku, nansho

nhinchiichihe ntu wulhumacha nulhumo nilheto.

⁴⁰ Nansho kila ittu ipangiyewe wo urata ni wo mpuha.

15

Uhihimmwa wa Kuristo

¹ Vano etu ashilhoko aka, kinothanana uwu-upushani Malhove Orera yohimenrieakani alhe, ni inyu nkamwaapochera ni weemelha wo machiri nhina mwaya.

² Nnowoopolhiya wo iphiro yo Malhove Orera vanohalha inyu uvarecheshaka malhove yuuhimenrieakani ama yaahikhalleke chiicho urumelhelha winyu unkhalha wo nshatha.

³ Mii kahoovahani mwaattiva malhove o ulhoka chinene kaapochenre aka wiira Kuristo aakhwenlhe nlhatu no uwonya wihi thoko chilhepiye aya ni Malhove Matakatifu

⁴ wiira ahovithiya, nkaahihimmwa nihuku no neraru thoko chilhepiye aya ni Malhove Matakatifu,

⁵ wiira ahaakhumelhelha Nakefa ni kaanyuma aya ahaakhumelhelha akarumiya khumi ni elhi alhe.

⁶ Amalheke ahaakhumelha milhoko cha attu enchi aapwaha imia nthantu wo ikatema imoka, enchi aya ahawo akumi mpaka nna, nansho akina aya ahomalha ukhwa.

⁷ Kaanyuma aya ahaakhumelhelha Nayakhobo ahima aya Athithi, amalheke ahaakhumelhelha akarumiya onkhaye.

⁸ Yamalheke onkhaye ayo, nkaakikhumelhelha mii, kaari thoko ntu hiyarelhe wo kawaida.

⁹ Ukhallhawaywa mii phi mwankani chinene munlhokoni mwa akarumiya, ni mena akimphwanelhiya ata wiihaniya karumiya, wo nlhatu no waapangelha chittu cho unanara attu a Nlhuku.

¹⁰ Nansho, wo nnema wa Nlhuku, kihokhalha thoko chiri aka, ni nnema wawe uwannyaka, khawaari wo nshatha. Mii kihovara ntheke waapwaha onkhaye, akihena mii hasa, nansho nnema wa Nlhuku unovara ntheke vamoka ni mii.

¹¹ Nansho inakhalkaka chiicho, ikhalhe ayo phi nohimiacha nttenga wa Nlhuku ama mii phi nohimiacha, khave ittu. Ni ilha phi iyo inohimiacha ihu ni ilha phi iyo inorumelhelha inyu.

Uhihimushiya wihi

¹² Vano ukhalhawaywa nttenga unoohimiachiya wiira Kuristo hohihimushiya, anooria chani etu attu akina munlhokoni mwinyu wulhumacha wiira khuuwo uhihimushiya wa attu?

¹³ Yakhalkaka etu khuuwo uhihimushiya wa attu, paahi, Kuristo ni uyo kaahihimmwe,

¹⁴ ni yakhalkaka Kuristo kaahihimmwe, paahi uhimiacha wihi khurina ittu ni upisha nrima wihi khurina ittu.

¹⁵ Wo uthepa vavawo, ni hii etu nanokhalha o uhimiechesha o woothacha wa Nlhuku ukhalhawaywa naheera wiira Nlhuku ahonhihimusha Kuristo, nansho khanhihimunshe yakhalkaka we ikekhiaye attu akhwilhe khanohihimushiya.

16 Ukhalhawaya yakhalhaka ikeekhene wiira attu akhwilhe khanohihimmwa, paahi etu Kuristo ni uyo khaahihimmwe.

17 Ni yakhalkaka wiira Kuristo khaahihimushiye, paahi etu nrima winyu urii wo nshatha bado mwaatti nrili mu uwonyani,

18 ni vavawo tho, attu onkhaye akhwilhe analhutaanne ni Kuristo, ahopotera.

19 Yakhalkaka etu ukhulhuvelha wihi nhina Kuristo unaacha ukumi wo vano ulha yekha aya, paahi etu, hii phi attu o woonelhiya ikiriri chinene waapwaha attu akina onkhaye velhaponi va.

20 Nansho ikeekhene iri wiira, Kuristo ho himushiya, aaholhelhaka anorupa nnookhwani alhe.

21 Ukhalhawaya thoko nookhwa chaawihiye awe ni ntu mmoka, phi chiichammo uhiihimmwa wa attu akhwilhe uwiihiye aya ni ntu mmoka.

22 Thoko attu chinokhwa aya ni ulhutaana ni Adamu, phi chiichammo attu onkhaye chinohalha aya uhiihimushiya wo ulhutaana ni Kuristo.

23 Nansho kila mmoka noohihimmwa kila mmoka wo ikatema awe, Kuristo achokholhaka, khuttwaraka alhe arii awawe Kuristo ikatema vanohalha awe uwa.

24 Yamalhakaru, ikatema yo umalhelha inoowa Kuristo vanohalha awe waavaha umwene Nl-huku Athithi, vanowa awe umalhiha ufuta kila imwene ni ikuru ni machiri.

25 Ukhalhawaya Kuristo lazima ataware mpaka vanohalha awe waawulhusha amalhaponi awe ni waanyikalhelha wuuthi

inyaa chawe.

²⁶ Mmalhaponi nohalha umalhihera unyikalhelhiya nowa ukhalha nookhwa.

²⁷ "Nlhuku honyikalhiha chittu chonkhaye wuuthi inyaa chawe," paahi etu, vaneera aya, Chittu chonkhaye chihonyikalhelhiya wuuthi inyaa chawe wiira ataware phi ikeekhene wiira Nlhuku khanothakaneelha mu yoyo nkutira wo chittu uyo. Ukhalhawaya yoyo phi neesha chittu chonkhaye wuuthi inyaa cha Kuristo.

²⁸ Nansho chittu chonkhaye vanohalha aya weeshiya mmathathani mwa ikuru ya Kuristo, phi vavawo Mwaana ni uyo vanohalha awe wiicheesha mmathathani mwa Nlhuku eenshe chittu chonkhaye mmathathani mwawe, wiira Nlhuku ataware vachulhu chittu chonkhaye.

²⁹ Yakhalkaka etu uhimmwa khuuwo, chani attu anobatiiziya wo nlhatu na attu akhwilhe anokhulhuvelha upatta ittu yaani? Yakhalkaka attu akhwilhe khanohihimmwa, yeeshiyani etu ubatiiziya wo nlhatu waya?

³⁰ Ni hii etu, yeeshiyani wiihelha ntatakoni kila ikatema?

³¹ Ashilhoko aka, mii kirii nnookhwani kila nihuku! Wiishipa urina aka urii wo mu ulhutaanani winyu ni Kuristo Yesu, Athithi.

³² Nansho waatakana waka ni ashinama o Uefeso ukaari wo munttuni kikaapantte ittu yaani? Yakhalkakaru attu khanohihimmwa, nilhieke niwurieke etu, ukhalhawaya meelho ni-nookhwaacha.

³³ Nhithepiachiye! Unlhoko wo uhilhoka, unootanganya meetelho orera.

34 Munkweke! Nchokholheke ukhalha makhahelho orera, nhiyeke uwonya. Yeyo kinoohimeriani wiira irii yo wuulhiha muru chinene uwaninyu mwaatti ukhalhawaya akina inyu khanonchuwelha Nlhuku mena!

Iruttu yo uhihimushiya

35 Nansho ntu nowooria ukoha, “Attu akhwilhe anohalha uhihumushiya chani? Anowa ukhalha ni iruttu yo wiira chani?”

36 Cheechiyo phi chookohiya cho uhikhala maana! Mwaalhakaru imbeyu ikumi, yaahikhweeke khinomelha.

37 Inaalha inyu phi imbeyuru, veekinaka yo ingaano ama yo yolhia ikina, ni mena kuhiwe iruttu yo nnyepu nkumi unohalha umelha kaanyuma.

38 Nlhuku noovaha yeyo imbeyu iyo nnyepu inothanana awe mwanene, kila imbeyu ipattaka iruttu inolhikaana aya.

39 Iruttu cho chittu chonkhaye chuupiye khachinlhikaana. Iruttu cha attu khachinlhikaana, cha ashinama chiri cho inamuna chikina, cha ashinuni chiri chikina ni cho ihopa chiri chikina.

40 Chihaawo iruttu cho wiirimu ni iruttu cho mwiilhaponi, nthimicho wo iruttu cho wiirimu uri nkina ni urera wo iruttu cho mwiilhaponi uri nkina.

41 Uhaawo urera wo nchuwa ni nkina wo mweeri ni wo ittotwa, ata ni ittotwa ni chiyo chihaawo chihinlhikaana urera waya.

42 Phiri aya chiicho mwaha wo uhihimmwa. Thoko imbeyu chiri aya, iruttu phi inowuhelhiya ntayani nkayonta, nansho inohihimushiya ikhalhaka yo uhuunta.

43 Inowuhelhiya inari ihithimichiyaka, nansho inohihimushiya inari ni nthimicho, inowuhelhiya yo uhuperia nansho inohihimmwa ikhalhaka yo machiri.

44 Vanowuhelhiya aya inokhalha yo velhaponi irina ihu ilha, nansho vanohihimmwa aya inokhalha iruttu yo mminepani. Ukhalhawaya ihaawo iruttu yo kawaida ni uhihimmwa iruttu yo munnepani.

45 Ukhalhawaya Malhove Matakatifu aneera, “Ntu o upacha, Adamu aari yo wuupiya yo ukumi.” Nansho Adamu o umalhelha phi Iphumu ya Nlhuku naavaha attu ukumi.

46 Nansho inoholhelha kihewe iruttu yo munnepani, nansho iruttu yo kawaida ilhe, tho khuwaaka iruttu yo munnepani.

47 Ntu o upachera wuupiya Adamu, aakhumme ntayani, Adamu o nayelhi aakhumilhe wiirimu.

48 Onkhaye arii velhaponi ari thoko yoyo ntu oopiye ntayani uyo, ni ayo arii wiirimu anokhalha thoko uyo aakhumme wiirimu uyo.

49 Thoko chinre ihu wo ulhikaana ni uyo oopiye ntayani uyo, phi chiichammo chinohalha ihu ulhikaana ni uyo aakhumme wiirimu uyo.

50 Paahi etu ashilhoko aka mii kineera, iruttu ni iphome khachinooria uhiyeriya umwene wa Nlhuku ni ittu yo wuunta khinooria uhiyeriya uhuunta.

51 Mwiwelhelheke etu kuuhimerieni ittu ivithiye, hii khaninokhwa onkhaye, nansho ni-nowa urukunushiya

52 ikatema yo nrombe no umalhelha, uphilha ni upathusha miitho. Ukhawaya ni-palhapata no umalhelha vanohalha aya wii-wania noopiyaka, attu akhwilhe anoowa aahimushiya wo iphiro yo ukumi uhinokhwa tho, ni hii ninoowa naarukunushiya.

53 Ukhawaya ihophwanelhiya kila ittu yo wuunta iware uhuunta, iruttu yo ukhwa iwarihiye uhikhwa.

54 Paahi etu iruttu yo wuunta ilha vanohalha aya urukunushiya ukhalha yo uhuunta ni ittu yo ukhwa vanohalha aya urukunushiya ukhalha yo uhikhwa, phi vavawo vanohalha aya utimira nlhove nilhepiye nne, “Nookhwa hokottolhiya!”

55 “Uwe nookhwa ukottolha wao uri vayi? Uwe nookhwa uri vayi uweria wao?”

56 Nookhwa nopatta machiri o weeria wawe mu uwonyani, ni machiri o uwonya phi Malhero.

57 Nansho ninshukuruku Nlhuku nonivaha machiri o ukottolha wo iphiro ya Athithi Yesu Kuristo.

58 Paahi etu ashilhoko aka kinaattuna aka, mweemelheke rata nhitikhinyie. Nthepeke mahuku onkhaye ukuruvalhelha ntheko wo waakavihera Athithi, nchuwelhaka wiira ntheko unopanga inyu wa Athithi khunowa waapotera wo nshatha.

Ukumiha ittu yo waakavihera attu a Nlhuku

¹ Vano phi mwaha unaacha ukumiha ittu wo nlhatu no attu a Nlhuku, mpangeke thoko chinre aka wo waalhehera attu anrumelhenle Kuristo anokhalha Ugalatiya.

² Kila ntu munlhokoni mwinyu echeshereke nchurukhu kila jumaapili thoko chipantte awe. Ikhalhe wiira akhalhaneke ittu yo ukumiha nihuku no unlhapelha Nlhuku. Nihiwe naakhumelhelha nlhove no upangiya nchanggo ikatema vanohalha aka uwa.

³ Ikatema vanohalha aka uwa uwaninyu vawo, kinoowa kaaruma attu mwaathanlhe inyu wiira arweehe iwarakha ni isawadi chinyu cho uttuna Uyerusalemu.

⁴ Yalhokaka wiira ni mii kirwee wowo, kinowaattukana etu.

Moopuwelho a Napaolo

⁵ Kinoowa wowo kamalhaka uvirelha Umakedoniya ukhalhawayu kiholhakelha uvirelha Umakedoniya uwo.

⁶ Veekinaka kinoowa kaakhalha uwaninyu wo mahuku vakani, ama veekinaka kinoowa kaakhalha vamoka ni inyu mwaatti nlhaalha wonkhaye wo uririya, wiira mmwe mwaakikaaviha nkwhaha uriwoothu unohalha aka urwaa.

⁷ Akinottuna uvirelha uwaninyu uwo chitemachitema ni urwaa munkwahani. Kinokhulhuvelha wiira, Athithi akivaheraka, kinoowa kaakhalha uwaninyu uwo mahuku vakani.

⁸ Nansho kinoolhokelha Vaefeso va mpaka nihuku no Pentekote.

⁹ Nlhako wo nlhatu no ntheko waka uhopatakuwa vaa, inakhalhaka wiira ahawo attu anokivinga, ni ayo ari enchi.

¹⁰ Natimotheo yawaakaru, mwaapochereke rata, wo uhikhala nipampa, ukhalhawayaya anopanga ntheko wa Athithi thoko chiri aka mii.

¹¹ Paahi etu ntu riyothe haaveehe nansho mwaakaviheke athepeke urwaa nkwhaha waya wo mpuharu wiira yamalhaka, ahokolhie uwan-nyaka ukhalhawayaya ninowaaweherera mii vamoka ni ashilhoko ihu.

¹² Wo mwaha unomwaacha munnihu Naapolo, kihachontelhelha chinene wiira aweeke uwaninyu uwo vamoka ni manyonnihu akina, nansho khanttuna uwa ilha ikatema ilha, anohalha uwa apattaka nipesha kaanyuma.

Malhove o umalhihera

¹³ Nshiheke, mweemelheke rata wo nrima, mmindeke, nkhalheke ni machiri.

¹⁴ Kila ittu inopanga inyu mpangeke wo nrima wo uttuna.

¹⁵ Ashilhoko aka, nhochuwelha iwani i Nastefana, yayo phi attu o upacha upochera nrima wo Ikuristo Uakaya, ni ayo aheekumiha waakav-hera attu a Nlhuku. Kinoulhepelhani mwaatti wiira,

¹⁶ ntwareke uholhelhi wa attu thoko yayo, ni uholhelhi wa kila ntu novara ntheko ni ukaviha vamoka ni ayo.

¹⁷ Kinooteelhiya nrima chinene wiira Nastefana ni Afotunato ni Akaiko ahowa, ahotiya vakittu vahaatiminre wo nlhatu no uhikhala winyu vaa.

18 Ahoteelhiha nrima aka ni mirima chinyu tho. Paahi iholhoka woopuwelha attu thoko yayo.

19 Attu a Nlhuku onkhaye o Uasiya anouvahani isalamu. Naakwila ni Aprisila vamoka ni attu anrumelhenhe Kuristo onkhaye anokumaana unupani waya anouvahani isalamu chinchi muulhutaanani Athithi.

20 Ashilhoko ihu anrumelhenhe Kuristo onkhaye anouvahani isalamu. Ni inyu kila mmoka ammaheke nkunananawe mmono wo ibarakha chitakatifu cho uttuna wa Nlhuku.

21 Miyaano Paolo kinouvahani isalamu chinolhepa aka wo moono aka kimwanene.

22 Ntu riyothe hinaattuna Athithi, yoyo alhaviyeke. Thithi, nkawaani!

23 Kinowulhapelhani nnema wa Athithi Yesu ukhalheke ni inyu mwaatti.

24 Uttuna waka ukhalheke uwaninyu wo ulhutaana ni Kuristo Yesu. Aye.

**Makua New Testament 2015
Makhuwa-Meetto: Makua New Testament 2015 New
Testament**

copyright © 2015 The Word for the World International

Language: Makhuwa-Meetto

Contributor: The Word For The World

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-14

PDF generated using Haiola and XeLaTeX on 13 May 2025 from source files dated 14 May 2025

87ae4d2f-90f6-5bdd-b41e-00464a1ad514